

適園叢書

張宗祥



通國書舍



張氏藏

汪氏珊瑚網法書題跋卷十二

元天目山禪師劉順法語

真跡小行書

蕭路教深達聖賢之道嘗以委順子自省其旨世間萬物各有數初不以逆而強致焉在乎知時識變樂天知命者固能隨順世緣無甚罣礙孔聖以此一貫之道示曾子領其旨一唯而已維摩居士以一然而談其不二吾之諸祖或擎拳豎指或棒或喝皆示之以委順之一方便也老氏以天得一以清地得一以寧而發揚委順之道從古聖賢莫不以此而傳之後世倘欲別起一念殊勝奇特之見以屬強爲則不委順也其順之之理一委之於造化豈聖人而能轉之而凡人可料之惟貴深造遠詣堅確不易其正念之士方能如是與凡

聖混同一區來去自由由于萬象之表豈不慶快平生也哉又
爲銘之

天地萬物混同一區無罣無礙靈妙自如用之于世不束不
拘行之于時圓同太虛樂天知命逆順同途不委不順吾何
所圖風清月白洞澈吾廬

天歷二年西天目山師子正宗禪 逆流沙門劉順敬
書

中峰禪師九字梅花詠

昨夜西風吹折干林梢渡口小艇滾入沙灘圻野橋古梅獨
臥寒屋角疏影橫斜暗上書窗敲半枯半活幾箇擻蓓蘂欲
開未開數點含香苞縱使畫工奇妙也縮手我愛清香故把

新詩嘲

天有月兮地有松何堪松月趣無窮松生金粉月生兔月抱明珠松化龍月照長空松挂衲松回禪定月當空老僧笑指松頭月松月何妨一處供

松月

琦楚石詩翰

船上見月如可呼愛之且復留斯須青山倒影水連郭白藕作花香滿湖仙林寺遠鐘已動靈隱塔高鐙欲無西風吹人不得寐坐聽魚蟹翻菰蒲

中秋後二日與覺隱諸老曉過西湖率爾口占廷玉郎官索書錄呈求教

梵琦再拜

興化打克賓只要法戰勝我遮裏不然埽除佛祖令住山五十載撲碎軒轅鏡臘飯香滿堂有眾齋廚盛捧了出院人悟去也不定 徒弟珠維那職事美滿可悅眾心一偈送之參方行腳了吾宗生死大事勉旃

楚石道人梵琦

元名公翰墨卷

余讀姚江吳氏三葉墓志文而因知世運之有高下也始銘南堂老人者唐公震也其言雖僂而猶清狷可喜時蓋去乾道中興未遠也中銘雁峰隱人者陳公著也其言萎甚蓋宋就衰矣及觀銘天台賞官者臧公夢解也其言約以則蔚乎有古章時則聖元一統已五十年矣於平文章高卑與世

運推移豈不信哉高庠弗傳求事狀不朽難矣雖然續承義烈使光遠而有耀則在吳氏後人也季章父爲三葉後人也隱居行誼無忝厥先其能光遠而有耀者哉

至正丁亥秋一日鐵厓山人楊維禎書

昔人謂百年之計樹之以德若吳氏之三世行誼其樹之也遠矣其枝葉之蕃碩也必矣夫勳舊之家豈無累數葉躋顯仕者然德或不繼雖如潁川陳氏猶不免公慚卿卿慚長之譏況其他乎此士君子之所以有取於吳氏也與

永嘉高明則誠甫謹識

南堂三世獨傳書世祿雖微德有餘莫問幾多喬木在海棠

已可著巢居

靈石山人張雨

青山堂上和尙清遠禪師侍者賤跡留小溪三載劇辱寵愛
所謂待我以國士者是也臨別承厚贈感愧無極別來四載
世殊事異思一會面而不可得南望青山未嘗不惻惻愴悽
欲絕去歲聞從者留宣城復聞青氈復舊喜而不寐但山川
阻修音問竟絕可恨邇來不審起居輕利否世事可忍否眾
生易度否去年令法眷用章和尚示寂法門不幸良可慟哭
近聞宗遠和尚赴五竺之選可爲宗社之賀此老別來已二
十餘年矣雖欲一見其可得乎如會次望引情不尙閒居麤
遣亦遠庇所及也自前年五月來日念彌陀祈生淨土不識
他半果如願否亦欲吾老師知吾近況何如故言及此曾作

彌陀讚別紙求教會晤何時臨書惘惘惟願明時保愛爲大
法壽量不盡元旭頓首奉書

谷水二餅附上

竹深纔五六歲方從吳兄行之以學予見其骨秀神清知其
異時不碌碌也歲改月易做齋定齋俱已謝世予寓水北衛
史君書塾忽唫僧觀西巖見過談及近日詩人多稱竹深余
因省記舊游信口一律乘興拏扁舟偕西巖過石湖適值竹
深宅之悵然而返今又八九載西巖亦已圓寂矣昨暮偶訪
曾兄心傳而竹深在焉相與道舊欣慨交心因舉舊作竹深
亦不能無所感力請呈醜就書以贈時元貞乙未仲冬十有
九日也谷陽陸定龍頓首

永夜無寐起步階除明月在天西風入懷淒然知其爲
秋也輒用高韻勉賦一章以寫余心以布印可併座上
諸公

應元

秋高氣清水露石濁潦淤泥俱隱迹感時忽忽夜不寐明月
已向東山出出門仰瞻天無雲漸覺薄寒微中人須臾清光
入庭戶炯炯顏色疑如君萬物已非前所視慨念榮枯動幽
思玄蟬寂寞噤無聲塞雁嚶嚶向南至河流洋洋山峩峩朝
見花開暮辭柯相思美人隔秋水君分不知可奈何獨立旁
皇無所得自慚在君珠玉側明月西沈愈思憶積余鬱鬱其
無極

無款五言一律

前有鮮于伯機數段失錄

修竹深深處人閒俗慮消時將碧玉調寄在白雲謠雪乳臨風瀾冰花對佛燒思君不可見乘興動蘭橈

有感一詩寫奉則敬兄弟賢姪 左瞽

感爾多堂弟參之同翱翔翩翩西復東品似鴻雁行攸居沙渚暖菰蒲新芽長秋風順節序亦復館稻梁我獨有一弟今我竟誰將念之不可招血淚霑衣裳

櫻寧先生見之仁者之念亦不能不爲我潛然也朝陽當亦相與興歎殊可悲耳

乙卯十二月在金壽堂書

楊子江頭十尺蘆望中渾是小方諸八窗爽籟含清氣一水

空明倒太虛邊草不栖□□□露莖眞溼玉蟾蜍晉家車胤
如知得安事螢囊去照書

席帽山人王逢題於樂意生香之亭時歲己酉秋八月
五日也

右頓首拜覆潁川教授先生尊座右自十九日因新令尹定
役而入城日在縣治故未能往謁爲慊昨晚從孟達親文家
飲散歸領尊翰且承英嗣見過恨不得見頃又承過我問信
足紉不遺之盛心吳中搢紳先生求如尊先生文章道德指
不一二屈尙欲以閒暇日與遂昌公諸老過笠澤徜徉數日
併聽教誨幸甚僭易就稟區區欲購得歐陽文忠公大全集
一部煩因便手舊人家所藏者詢及示望分情連日稍涼計

尊體納福聞微恙不克往問候稍暇專謁屏著以謝不備

沈右頓首拜

令嗣甚聰俊必能多讀書此先生積德所致也右也年四十矣甚爲寒心

右贅言

余又見沈仲說書致叔方教授後云小兒多蒙戒諭感感城中人來對右言小兒朝暮穢語責罵姚媼萬乞嚴訓不使肆縱幸幸是仲說四十後得子也蓋仲說之室鄒有賢德嘗爲夫買妾殊美仲說詢知爲故人女卽擇配嫁之其室隨育子信食報之不爽哉而不爲舐犢愛更難矣

此卷久爲先荆翁藏玩前有米襄陽山水橫幅高君明
水見之卽囑戴老以靖窑壇蓋十二求易附二佳筆作
裝潢資愚父子受蓋卻其筴其筴竟爲居閒者所沒又
有元名翰爲張紳張文在程璠鮑恂王東諸人先後爲
此輩賺去嘗憶文在句高公山水趙公書今代何人與
比馳及漁父詞云我是箇不識字煙波釣叟恍然在目
也玉記

元賢翰劄疏

右前海寧州同知楊性所藏先友遺蹟一卷凡十一人詩文
若干篇性曰先君子字伯振至正閒從事浙省一時名士大
夫多與往來爲詩文性收藏甚富兵火之後往往散失此其

僅存者且以先友不著字與官爵劣于柳記求余記之以余
嘗游諸公間也盛熙明字熙明能書辟奎章閣書史著法書
攷傳于世堵簡字無傲能書畫浙省椽吳溥字博泉以才識
自負結交海內名士 兵興福建守臣承制署爲其省參知
政事楊維禎字廉夫丁卯進士江淞儒學提舉俞氏兄弟者
吳人俊字俊平江路推官庸字子中華亭縣尹有晉人風葛
元喆字元喆戊子進士翰林編修官高明字則誠乙酉進士
柯九思字敬仲奎章閣鑒書博士劉基字伯溫今御史中丞
黃潛字晉卿甲寅進士翰林學士諡文獻文章爲世推重此
致政後所書謙恭端謹足爲後進取法觀之猶可想見其儀
型嗚呼余嘗謂人子欲顯其親至錄其所與交若柳子者可

謂孝于其親無所不用其心然所記不過姓名爵里而已能
併存其遺文如此可謂有加前人者哉東坡爲先友記六十
七人攷之于傳卓然知名者二十人今楊氏先友十一人其
文章事業鮮不載國史者性言其所散去者趙文敏公康里巖
公仲弘楊先生眾仲陳先生道士張伯雨則又無媿柳記多
矣伯振君諱祖成仕至山陰縣尹嘗從學須谿劉先生性字
彝仲學于廉夫少學詩于文獻

齊郡張紳拜手謹題

元人竹深處賦并敘詩卷

姑蘇劉孟功先生性嗜竹種之數萬竿蔚然成林孟功日居
其中同志者過之輒留終夕或信宿而去迺取杜少陵竹深

留客之句頗其所居曰竹深處蓋心有以契乎竹也鴻儒碩士咸爲之品題余與先生相知之久因爲之賦以貽之且以爲竹逸之一助云

繫余生之好奇負磊落而不羈嘗縱歡乎淇水之湄弔古於嶰谷之谿過瀟湘登九嶷斐然武公之想邈焉伶倫之思慨重華之不作悵二妃以增悲因物懷人屢觸于目惟懷懷之高風託娟娟之修竹是竹也稟君子之貞抱幽人之獨鶴兮斯巢鳳兮斯宿宜雨宜晴宜寒宜燠挺蒼煙之萬竿散涼飆于三伏夜月篩瑣瑣之金秋聲戛鏘鏘之玉此其竹之可愛不一而足者也時有種竹主人謂余曰子徒知愛其竹而嘗造于竹之奧區乎乃披蒙茸拉榛蕪遂探其幽遂闢其虛肩